

الباب الخامس

"باب الاختلاف"

الشعر عفريت اللي مات
الشعر تحضير اللي فات
الشعر نحات القلوب
شاطر في نحت الذكريات
الشعر عمره ما كان علاج
والشاعر الشاطر مريض
أول ما بظهر من بعيد
يقولوا ده "كيرلس سعيد"

صاحبك بقى..
مشهور قوي في المنطقة
يمشي يسلم ع الجميع
بلده تحبه وتعرفه
يقول قناعته وعمره ما إتعود يبيع
وحاجات كتير بتخوفه

وقت أما يلمح حزن في عنين الجيران

وقت أما يشوف العيال

داخلين لجان الإمتحان

وقت أما بتّمطر قوي

وتدّوب الماسك القوي

والروح تبان

ويعيّط القلب الجعان

شحات حنان

وسط جمع المحتاجين

بيمد إيده للسنين

تديه آلام

يرجع يفضفض بالكلام

ويدنده في ليّله الحزين

ع الشط واقفة بنت في العشرين

بالصدفة يفضح قلبها فحوى الكلام

لكن قوانين الزحام

تمنها تكشف دمعها

تضغط عليها فتبتسم

صاحبك وبرده بيتسم
علشان يعديها بسلام
وعشان عينين بتبص ليه
بصة محبة وإحترام
وعشان حرام
يخذل قلوب مسنودة بيه
وعشان حرام
يقوله بس يارب ليه؟
صاحبك وبرده بيتسم
وهيتسم
لأجل أما يظهر من بعيد
يقولوا ده "كيرلس" .. "سعيد".

